



Якшур-Ббдья
ёросысь
"Pascvet" газетлэн
приложениез.
Потэ 1991-тй арысен

Утёме выжыосмес, жэтоме асваланмес!

ОШШМЕС

2018 ар
28-тй
куарусён
(сентябрь)
удмуртарня
(пятница)
№19 (1172)

27-тй куарусёнэ - визьнодасълэн (воспитательлэн) нуналэз

Нылпиослэн шумпотонзы

★ ПРАЗДНИКЕН!

Пичи пинал
нырысетй кылзэ
вераз. Анай-атай-
ёслэн сюлэмзы
шудэн пачылмиз.
Та нырысетй кыл
бордысен ик кутске
пиналлэн улон
сюресэз.

*Нош кыче кылын со мамыш
лэсьтэмын? Улыськом ке ась-
меос Удмуртиын, удмурт кы-
лын шуыса верам потэ. Но та
кыльёслы тросэз пумит вазё-
зы, со озьы ёвёл, шуозы. Веть
туннэ удмурт кылзэ урамысь
но шер гинэ кылод ини.*

Но ми удмуртёс бере, кы-
зы милемлы ас кылмес, ка-
лыкмес, культурамес, сям-
йылольёсмес тодытэк?

Та югдурез воштон понна
чурит ужпум пунктэмын Мук-
шиысь нылпи садын но. Отын
котькуд арняе одйгез нунал
быдэсак удмурт кыллы сйзе-
мын луэ. Бадзым группаысь
визьнодасьёс Оксана **Сели-
вёрстова** но Руфима **Широ-
бокова**, шор ёзо группаысь
воспитательёс Маиса **Се-
ребрякова** но Елена **Якимо-
ва**, покчи группаысь Надежда
Васильева но Надежда
Шулятьева мылысь-кыдысь
ужало удмурт кылзэ пиналь-
ёслы пычатон бордын. Соос-
лэн валтйсь ужпумзы: пи-
нальёсты кык кылын верась-
кыны дышетон но арлыдзыя
тупась тодон-валаньёс сётон.

Кыльёсты дышетон визь-
нодасьёслэсь кылзэ мур тодэм-



Надежда Васильева но Оксана Селивёрстова нылпиостэк асьсэды уг адёо ни

зэ, тыршемзэ но быгатэмзэ
кулэ каре, малы ке шуоно бер-
ло арёсы гурт нылпи садъё-
сы но зучомем яке чылкак зуч
пинальёс ветло. Та вакытэ
пусьем потэ, Мукши нылпи
садын вань визьнодасьёс уд-
муртёс шуыса.

Соослы ужазы бадзым юрт-
тэт луэ Роза Кузнецовалэн
2017-тй арын потэм "Жи-
льыртйсь ошмес" (0+) дыше-
тон программаез. Со юри гож-
тэмын анай кылзэ тодысьтэм
но зучомем 4-7аресъем пи-
нальёсын ужан понна.

Озьы ик воспитательёслы
туж юртто мукет пособиос:
В.А.Анисимовалэн "Котырысь
улон но мон"(0+) хрестоматия,
Е.А.Николаевалэн "Ог-огедлы
жечен"(0+), А.М.Комаровалэн

"Вераськон куараос - кыче
пёртэмесь соос!"(0+) Та би-
четъёсы кылбуръёс, выжы-
кыльёс, мадиськонъёс, исась-
конъёс, пичи веросьёс но трос
пёртэм шудонъёс люкамын.

Ваньзэ сое ужаз кутэ Мук-
ши нылпи садысь старшой
воспитатель но, со дыре ик
покчи группаез нуись Надеж-
да Васильева.

Надежда Владимировна
ас дыраз УдГУ-ысь удмурт
филология факультетэз
йылпумъяз. Нырысь ик ужаз
Мукши школаын немец кыль-
я дышетйсьын, собере эскериз
корреспондентлэсь удыссэ,
гурт клубазы тыршиз но нош
ик пинальёс доры берыт-
скиз. Нылпи садазы нылкыш-
но куать ар ужа ини, со дыр

куспын пичиос борды бур-
миз шуыны луоз.

Та муспотон но туж сюлмо
нылкышно Сергей кузпалыныз
Чош кык нылъёссэ будэтйз ини.
Софья но Дарина тожо УдГУ-
ысь удмурт кылья но финно-
угроведение институтын ды-
шетско, огез венгр, мукетыз -
финн кыльёсты дышето. Анай-
зылэсь аджем каро, лэся.

Мукши нылпи садлэн
кивалтйсьез Людмила **Исаме-
това** ужасьёсыныз данъяське,
соос ваньзы ог-огзылы юрт-
то, ужамзылэсь емышъёссэ
мумы-бубыос но шодо, шуэ.

Мар бен, удмурт кылзэ
ульчаосы берыктон ужзы мед
удалтоз!

Праздникен, эшъёс!
Вера ВАХРУШЕВА

Огъя ужамлэн емышъёсыз

★ "УДМУРТ СЭРЕГ"

Покчи группаез нуись визь-
нодасьёс азын валтйсь
интые султэ анай-атайёсын ку-
сыпъёсты тупатон уж. Бордаз
ик мумы-бубыосты ас верась-
коназы удмурт кылзэ кутон
сырысь вераськонъёс но ялан
мыно. "Анай кыл - улонэ ны-
рысь мамыш", - шуиз Флор
Васильев. Озьы ик вань, анай
кылмы улэ ке сюлмамы, сое
одно шараяно.

Кыкетй арэз группаямы
анай-атайёсын Чош проектёс
кылдытон бордын ужасько-
мы. Огез проектмылэн нимыз

"Удмурт сэрег", татын ми пи-
нальёсты удмурт лулчеберет-
тэн тодматйськомы.

Малы басьтйським та про-
ект борды? Пичи пинальёсты
анай кыллы дышетон бордын
ужаку, малпасько, одно ик
лыдэ басьтоно, пичи пинал-
лэн улоназ нырысетй интыын
анай-атаез сыло шуыса.

Соин та ёрря ужмы туж
умой азинскиз. Анай-атайёс-
мы но мылысь-кыдысь бась-
тйськызы чектосмы борды.
Котькудйз мылдызыя уж
басьтйз. Пу бордын ужась
атаймы милемлы кубо
лэсьтйз, чугун посуда, нянь

лопатка вайиз, мукетыз - жёк,
валес, пукон пёрмытйз. Анай-
ёсмы нош кин ке пёртэм буё-
ло выжлөгет керттйз, кин ке
бумагалэсь аппликация - уд-
мурт орнаментэн ковёр дасяз,
мукетъёсыз валес котыр но ку-
ролэсь, басма кесэгъёслэсь
шудон мунёсты лэсьтйзы, ку-
рикен но керттйзы. Пичиослы
соос туж яразы.

Удмурт сэрегамы пукыку,
пинальёс чемгес яратоно му-
нёсынызы шудо, угось соос-
ты сэрт-тыны-пертчаны луэ.
Нош векки арбериосын выры-
кузы, соослэн чиньыоссы кы-
дало, азыланяз та выллем шуд-
онъёс пичиослы чебер гожь-
яскыны юрттозы. Со дыре ик
пинальёс асьме историены-

мы тодматско, кыче мунёсын
бабушъёссы шудйзы, тодо.
Туала коркаосын бадзым
гуръёссы но, нуны кёкыос но,
кубоос но ёвёл ни. Нош ми-
лям вань. Пинальёс соосты ас
синмынызы адёо, пыраклы
йырвизьмазы пычато.

Та сэрегамы нылъёс-пиос-
мылы туж тунсыко потоз азы-
ланяз но. Анай-атайёслэн пи-
нальёсынызы Чош ужамзы уд-
мурт выжыосмес тодамы вай-
ытэ, со дыре ик йыг-йыг, вань-
мызлы кылымон, удмурт кы-
лын возъдаскытэк вераськы-
ны юрттэ. Мытэм ужмес ми
одно ик азинто.

Надежда ВАСИЛЬЕВА,
Мукши нылпи садысь
покчи группалэн визьнодасез

★ ИВОРЬЁС

"Пичи шоу"

"Мынам Удмуртие" телека-
нал туэ нош ик "Пичи шоу"
(3+) проектсэ азыланъэ.

Та чёлтон нырысь ик юрт-
тэ ёросъёсысь нылпи
садъёсы ветлйсь усточи пи-
нальёсты шараяны, быдэс
элькунмы тыр быгатонлык-
ёссэс возматаны.

Кылем арын та ужрадэ
пырыськызы тросэз нылпи
садъёсмы: Мукшиысь,
Чошкытысь, Тылоысь, Як-
шурысь, Якшур-Ббдьяысь
4-тй но 5-тй садикъёс но
гимназия.

Туэ нылпиослэсь быга-
тонлыкъёссэс паськытгес
учкыны малпамын: эктэм
сяна (озьы кылем арын вал),
туэ пинальёс удмурт но зуч
кылын кырзамзэс, чебер
вераськемзэс но крезьгуро
инструментъёсын шудэм-
зэс возматозы. Отчы пы-
рыськыны быгатозы 3-сен
13 аресозь пичиос но быдэ
вуымтэос.

Озьыен, азылань, якшур-
ббдьяос! "Мынам Удмур-
тие" телеканал вите усточи-
осты!

В. ПЕТРОВА

Жильыртйсь чуръёс

Ижкарысь Йоскалык биб-
лиотека "Можгалэн жильыр-
тйсь чуръёсыз" (6+) конкурс
ортчытэ.

Дышетскисьёслы вольыт
лыдэно луоз Можга ёро-
сысь кылбурчиослэсь чуръ-
ёссэс. Туэ уго Йоскалык биб-
лиотека Можга ёросысь ли-
тературалы сйзем ар ялйз.

Котькуд ёросын Чошат-
сконлэн нырысетй быръён
вакытэз ортчиз ини. Якшур-
Ббдьяысь пинальёс но пы-
рыськызы нырысетй этапе.
Ваньмыз Чош 19 удмурт но
зуч кылын гожтэм видео-
ужъёс люкаськызы.

Дуньясьёс шумпотыса
пуйызы, ёросамы кыл-
буръёсты чебер но вольыт
лыдзыны быгатйсь пиналь-
ёсмы вань гинэ шуыса. Туж-
гес умой лыдзисьёслэсь
видеооссэс - со Ксения Ель-
цовалэн но Карина Кулако-
валэн зуч кылын, но Софья
Широбоковалэн но Даниил
Широбоковлэн удмурт ся-
мен лыдземзы - Йоскалык
библиотекае ыстэмын ини.

Табере пинальёсмы Иж-
карын вожвылъяськозы.
Оскиськом, соослэн вань-
мыз пормоз.

Лидия КАСАТКИНА,
ёрос библиотекаын
ужась